

四庫全書

集部

欽定四庫全書

集部

白鳴集卷一

五

詳校官庶吉士

臣范逢恩

主事

臣

呂雲棟覆勘

謄錄監生

臣

王人作

謄錄監生

臣

秦澧

欽定四庫全書

集部四

提要

自鳴集六卷

別集類三 宋

臣等謹案自鳴集六卷宋章甫撰考宋有二章甫一字端叔浦城人熙寧三年進士官至都官郎中著有孟子解義十四卷楊時為作墓誌其文今載龜山集中一字冠之鄱陽人徙居真州自號易足居士即撰此集者也甫

行事不槩見惟張端義貴耳集有云張冠之

名甫有文集十卷多從于湖交游

案于湖乃張孝祥之

別號豪放飄蕩不受拘羈淳熙間准有三士舒

之張用晦和之張進卿真之張冠之也據其

所述可畧見其為人具以章為張蓋刊本字

訛耳又陸游入蜀記稱乾道六年八月二十

八日同章冠之秀才登石鏡亭訪黃鶴樓故

址則甫蓋嘗應舉矣其集不見于宋史藝文

志文淵閣書目雖有其名而傳本久絕其得見
于世者惟名賢小集拾遺所載湖上吟一首
詩家鼎鑪所載寄荆南故人一首而已今檢
永樂大典所收自鳴集詩句頗多其格律雖
稍近江湖一派而骨力蒼秀亦具有研鍛之
之功觀其別陸游詩有人生相知貴知心道
同何必問升沉之句謝韓元吉寄茶詩有別
公宛陵今五春渴心何啻生埃塵之句次韻

呂祖謙見寄詩有山林舊約都茫茫憶君著
書看屋梁之句是其所與酬贈者皆一時俊
傑之士故耳濡目染尚能脫化町畦自成杼
袖頗為不墜雅音謹裒次釐訂析為六卷至
雜說三篇以禪家機鋒論道德仁義之旨援
儒入墨是殆不得志于時者之肆志放言然
其害理已甚今故附其說于集末而特加糾
正以著其失焉乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

自鳴集卷一

宋 章甫 撰

五言古

送馮圓仲入蜀

我本山中人早信雲無心卷舒隨清風或作三日霖十年江湖遊復識水之性東西因地形圓折初無定却來閱世人惟公多古風用舍不繫懷畧與雲水同還乘明月舟西沂弄雲水雲水遠送迎鷗鷺皆知已我今與公

別亦若雲水然相望渺江湖萬里同青天

送張寺丞

知己不易得相知貴知心我行遍四方公獨知我深公
如千丈松凜凜有直氣我如松下草亦有傲霜意公分
刺史符謁來淮上州而我倦遊者振衣從公遊花月醉
管絃江山隨杖履激水瀦窮愁逢人賞佳句政成公入
覲酒盡客語離疊鼓催發船不顧邦人悲邦人勿深悲
宣室定前席公必念爾民還陳治安策吾君自神聖事

君公不欺祝公但加餐慰此邦人思

送孫文輔尉新城

我來淮上居忽忽歲月過定交誰最久有唱君必和
枰角勝負文字工切磋雲山結伴遊風雨對床卧那知
世塗隘但喜客愁破出處方乃殊離別情無那江城失
益友山縣得良佐平生愛圖史晚歲職警邏枹鼓常不
驚鷄犬亦相賀強飯君勉旃功名看老大

隱靜分題得靜字

平生苦愛閑多病復便靜每為林下遊忽若醉而醒茲
山昔嘗登當暑毛骨冷碧霄環珮聲古木旌幢影五峯
如高人一一各秀穎俗駕難久留佇立但俄頃別來三
十載往往夢清境從公得再來共此春日永憑高愜幽
思即事發深省然燈戰枯棋臨水淪新茗興闌下山去
妙處心已領曉雨濕籃輿衝泥度前嶺

古洗

古人不可見古物亦無幾今朝雙眼明乃識漢時洗規

模簡而質彷彿古君子年深土銷蝕薄處僅如紙篆名
可意逆依稀辨雙鯉傳寶今幾代是閱人多矣我生頗
好古摩挲不能已悠然起遐思俗物一何鄙

納涼

大熱金石流日色亦可畏鄙夫先多病喘息僅存氣飲
冰不救渴膚汗那容睡秋風幾時來不問黑貂敝林梢
墮斜陽涼颼颼然至呼童汲井泉灑掃庭中地胡床得
露坐始覺有生意老妻破甘瓜兒女膝下戲鳴蟬雖強

聒亦足代鼓吹坐久月照人金波正澄霽惜哉疲繭甚
杯酒未敢置浮生能幾何荏苒忽中歲四時更代謝寒
暑不可避幻身豈長存中有不遷義且享今夕涼百年
安用計

和仲韓見簡韻

野人不愛名中歲益安命辛苦營一區婆娑只三逕那
知錢有神但喜酒能聖翩翩趙公子時時枉軒乘詩詞
既清婉筆力亦端勁傳家堅素守從仕傷直性語言生

風波道路足機穽君猶沉下僚我亦抱多病時偷半日閒樂此一室靜賞月已失期登高况當令風物漸淒緊江山更幽賔何時城南棲曳杖可乘興

和韓丈寄崖簿大雅并見簡韻

故鄉未可歸異縣難久留海深蛟鱷怒安得乘桴遊貧賤豈天意自不曲如鉤吾道未全窮三歲依賢侯小鷄隨孔鸞顧影良可羞所喜臭味同潔已從清修適來苦多病頗厭淮南州援琴操土風大類南冠囚今辰天氣

佳和風吹敝裘桃李競顏色誰能分劣優空攪遊子心
浩蕩生春愁新詩忽到手盛意知難酬材生天地間
小大固不侔詞鋒未易當如以楚伐鄒玉季更多文
情義還相投他年內集時尚記野人不
他年內集應呼我東坡與康國
也詩

雷

三伏久不雨今辰忽聞雷殷殷地中出轟轟空際來
電光倏先馳掩耳恐不及陰雲勢相交銷鑠畏毒日上

天行號令君子敬天威端坐每修省整冠仍斂衣蒼生
苦炎熱喘汗不可過寄聲謝豐隆為起神龍卧

秋雨未已客懷不佳夜誦少陵遣興詩至生涯
能幾何常在羈旅中三復增感每字賦一詩

日月無停輪歲律今崢嶸夜長客無睡打牕秋雨鳴早
寒逼衾裯兒女聲吽嚶令人愧老龐團圞話平生
借屋與僧隣局促僅如蝸悲秋懷抱惡頭緒如亂麻老
來怕讀書隙風燈影斜感時思弟妹衰淚落天涯

饑寒傍人門面目自可憎為善得長貧天理疑難憑狂
談取富貴易若階而升吾實畏鬼神勿謂吾無能

愁陰錯昏曉北風振葭葦關塞來悲鴻戰場多哭鬼人
生真幻戲歸盡同螻蛄貪夫患得失達者今無幾
逆旅故人少今秋風雨多禾頭欲生耳農夫空悲歌饑
腸望一飽替替同鴈鵝臨風不把酒奈此菊花何

門庭久沮如蚯蚓升吾堂夜寒人閒寥蟋蟀鳴吾床屋
頭兩株樹葉落滿僧廊騷人不須悲榮悴理之常

詩吟不必工酒實性所愛少年少拘束日與尊罍對沉
酣相呼亦有味阮輩會合不可常故人今好在

貧窮束縛人智慧無所施文籍紛滿前不救寒與飢佳
哉江上山歸隱寧無時青山若有言塵土君自羈

憶買京口船飄飄適荆楚覽古弔興亡亦有會心侶歲
月能幾何已作幽明阻筋骸幸無恙未害且逆旅

今辰氣候佳萬里來西風舉頭看浮雲已歸天漢東野
人還負暄帝澤流無窮心隨鴻雁飛不離霄壤中

簡王漕左司

人生天壤中孰不有所求小大雖不齊逐物常同憂士
子文字間亦各從所愛取舍未必同於道均無害我生
才甚下志與俗子殊思賢怒如飢覓句聊自娛惟公盛
德人君今乃行古富貴等雲煙詞翰敏風雨荆湖十五
州玉節何煌煌門庭無雜賓讀書清晝長振衣願從遊
自視亦何有未知函丈地能着野人否公誠一顧之足
以為我榮淮南有石田歸趁春雨耕

分題得草果飲子

神農書本草有美生南州春華穗端垂彷彿芙蓉秋青囊
貯嘉實璀璨安石榴香味極辛烈果中第一流磊落入盤
飮和羹充肴脩溫中與下氣功用亦罕儔苞苴走四海藥
籠必見收吾老苦病暍淡味空頻投作飲近得此選擇知
獨優碧井沉銀瓶斟酌得自由蔗漿已覺俗茗粥良可羞
乃知古聖人收拾靡不周日遇七十毒縱死夫何憂但吾
赤子多疾苦庶有瘳大哉仁者心當與天地侔

同張李子遊琅邪

枯藤久靠壁雙脚殊踈跼日長無往還午醉睡初熟誰
與來剥啄一馬挾兩僕翩翩張公子得得訪茅屋別來
今十年高誼驚絕俗功名付兄弟冠裳畏羈束多君殊
不凡愛我常易足呼兒取酒斟草草具肴藪劇談連晝
夜何止伴幽獨結為山水遊策蹇相追逐滁陽三日程
山路頗詰曲好風吹雨霽發輒自幽谷至樂聞金聲非
絲亦非竹沉沉栢子潭神龍所棲宿旱乾禱輒應雲雨

手翻覆路轉醉翁亭釀泉漱寒玉堂堂四公像再拜敢
不肅雖云斗大州盛德繼來辱凜然生氣在遺澤被草
木梵宮最高處俯視山蟲蟲境聖人乃凡野僧才五六
碑崖爛文字驪珠混魚目老眼眩生花徃徃難盡讀吾
能領其要正自非匆促回途遂南首夜就湯泉浴清曠
舊書房懷人今鬼錄人生貴適意百歲風中燭所恨多
別離安能似康鹿茲遊詎難再後會尚可卜紀行因贈
行歸裝慰羞縮

題玲瓏

江月不受塵風竹儼相倚
牕間讀書人日用亦如是
涇渭豈同流天地果一指
客來問何如南山有雲起

鹿角

呦呦鳴鹿羣適意在林藪
泉甘草豐茂多力故能走
一朝觸禍機竟死誰人手
割鮮登鼎俎刺血置杯酒
犄角未易棄煮膠方術有
汲江為浸漬七日去麕垢
大候三伏時煎熬必覓岳
色作琥珀紅堅重如瓊玖
補陽遂強

骨輕健還堪久殺身雖可憐仁實存身後功能利生人
死且垂不朽悠悠肉食輩亦媿此鹿否

慈湖磯

峭壁激湍流湍流作洄湫初無一餉風飽我蒲帆腹長
筴寄怪石招呼爭挽牽艱難僅寸進何翅如登天及磯
日猶高過磯日曛黑依約見漁村燈火照初夕舟師告
疲勞夜泊投人家驚犬吠籬落寒生蘆荻花

雨中舟出潮牖

官吏急星火驅民疏漕河城中三尺泥歲晚風雨多雨
聲來未已清滿幽人耳曲肱蓬底眠船隨夜潮起

卜宅

卜宅定何好廬山泉石奇夜夢五老人問我歸何時山
中有薝薇可以療子饑束書早歸來長歌歌紫芝

次高若虛韻

時事口慵說性靈詩可陶客中三日陰江頭風浪高六
年寄此邦鷗鷺皆心交煙波迥自如應笑吾生勞世路

轉逼仄旅鬢空蕭騷既往若電夢所得真毫毛歲月
解欺人木落江之皐勿謂吾甚衰得酒猶能豪舊遊固
可戀歸盟那得逃負暄依茆簷兒輩供爬搔

歸自真州道中用前韻簡諸故人

閑愁生旅懷薄酒安能陶籃輿赴歸期歷歷山路高風
雨道傍憩悠然思故交官閑想聚首懷我登頓勞辯論
雜嘲謔詩詞兼雅騷人生幾何時容易生二毛方今天
子聖登用皆夔臯願君各努力去矣追羣豪我生苦畏

事屏處如逋逃縱復技癢存敢念麻姑搔

俞廣文以詩定交次韻奉答

懶慢易招咎貧賤難相知客居二十年破屋臨江湄遣
悶豈無酒寄懷徒有詩慷慨思古人恨不生同時去秋
君始來雲霧容一披別去冒朔雪歸來迎南颺載登君
子堂爽氣生芝眉劇談兩無礙並駕行通達省聞冠多
士泮宮聊養願霄漢自茲始羽翮隨所之門闌謝俗子
遊戲惟毛錐高吟起我病意欲相箴規琢句要須工一

字亦有師逢迎君忽倦追逐吾敢辭人生俱寄耳况乃
多別離

曾仲恭侍郎惠酒以偶有名酒無夕不飲為韻
謝之

窮居少人事落落仍寡偶晨曦入茆簷和氣生戶牖擁
褐還負暄看雲更搔首閑哦陶令詩饑腸作雷吼
力耕不逢年歲暮百無有小雨肥麥根何時得餬口百
年倏已半辛勤為升斗賴古多若人千載可尚友

古來稱達人不顧身後名
豈其未忘世墮然聊遣情
我生本衰悞於時淡無營
但得秫可釀何勞詩有聲

烹魚多素書問字誰載酒
寂寞淮鄉居歲月亦已久
敢希陋巷樂但覺貧士醜
知音幸有人此事可不朽

丹陽賢使君高誼今所無
鈴齋有餘閑遙憶耕田夫
滿船送美酒盛事驚道途
客來即留醉不用倩行酤

一杯復一杯今夕知何夕
蔀屋發光怪尊罍盈四壁
老盆還舊觀寒燈起佳色
既醉使君酒亦飽使君德

逢人說項斯此道今則不使君如古人薦善惟恐後願
公登廊廟搜羅到巖藪使我擊壤歌投老安隴畝
使君開府來京口酒可飲公才真麴蘖留滯已再稔江
山助詩興草木入題品冰霜寒正嚴為國護饔飧

陪韓子雲弔張安國舍人墓

頃從武昌守來哭清果墓老淚濕征衫傷心不忍去馬
知五載後重到山崔嵬松栢條已拱宿草纏餘哀公乘
使者車忠厚神所賚遠懷平生親斗酒相沃醑曩以門

下故獲登君子堂招呼連屋居此意詎可忘青春閑佳
城榮華竟消歇空餘千古名不隨世磨滅蓬萊定何處
神仙知有無徘徊重徘徊悲風生坐隅

同張伯子威子季子雉子聞子陸及之時子政
家弟輔小子槃過馬清叟摘櫻桃以萬顆勻圓
訝許同分賦得許字

有城有隱居靜退我所與兩窮成邂逅一笑同出處脩
然五畝園耕種了寒暑朱櫻前日栽茂密已如許今歲

風雨時高枝墊難舉喜我領客來柴闌不吾拒倒衣出
逢迎掃地客燕醕童奴罷守衛徒馭先含咀肴核既雖
陳少長咸以序堆盤火齊紅磊落照尊俎眼明愛勻圓
酒興莫能禦吾儔既屬饜亦欲相就語西隣老禪伯攜
茗復來煮放懷誰主賓劇論忘爾汝題名污墻壁分韻
索毫楮月出未忍還不記城闌阻懽呼重攀折璀璨滿
筐筥行歌驚路人歸遺詫兒女明年更強健載酒寧無
侶但恐坐上客相望各吳楚

落葉

青青池邊樹歲久獨婆娑鳴蜩炎暑時愛此清陰多西
風一披拂顏色已非故朝看一葉飛暮落渾無數葉落
華歸根明年發陽春人生豈長好日月如飛輪

壽王真州

陽春耀桃李松栢不動心歲暮霜霰零松柏猶翠陰物
生天地間均此一氣爾小大有不齊乘除亦常理使君
盛德後清白由家傳平生功名心不作世態妍公為人

所難天念公所獨黃屋結深知青氊行可復致遠要自
近試公先一州生朝喜載臨頌聲滿江頭仁者壽固宜
富貴公自有作詩祝東風為勸尊中酒

送陳彌高

憶昨歲云徂艤舟岳陽樓獲見故人面使我明雙眸今
年風露涼君亦來荊州笑語倍疇昔舉杯相獻酬詞鋒
一當百鵬鶚橫高秋春風待變化勇往不可留看花得
意時豈獨為身謀伊予坐懶慢行矣歸林丘世故百念

冷潛魚畏吞鉤出處雖異途十載契分投肉食與藜羹
未用分劣優出門天地寬鵬鷗逍遙遊

寄上曾仲恭侍郎借淨香寮詩韻

官酒味甚薄客懷愁正濃節物苦催人木葉鳴西風覓
句了無得寂寞誰與同憑高望京口佳氣何葱葱中有
賢府主瑩然冰雪客家學傳正派政聲摩秋空閑哦燕
寢詩香篆紫房攏別來未兼旬頻夜夢見公白沙距西
津片帆可即通會當滌場圃還奉杖屨從只恐趨召還

接武夔與龍

題王履方畫漁樵扇

山深多虎狼腰斧老無力豈惟身上衣渾家口中食水
濶蛟龍怒魚鱉不易求雖無租賦迫常有風波憂偶來
蒼江頭落日相勞苦斗米今幾錢粗免寒餓否形役乃
如此人生真可憐五陵美少年寶馬珊瑚鞭

贈葉伯永

憶昨辛巳秋張帆過儀真別君適荆楚寤寐懷故人狂

寇初叛盟道路多紛紜思君不可見疑君墮邊塵寄書
無處所消息何時聞去年我東來泊船舊江津始遣訪
生死戎馬乃駸駸倉皇徑南渡憂畏損精神仲冬丹陽
館驚喜忽見君執手兩無語老泪欲沾巾嗟予漫奔走
萬里長酸辛念君兩鬢白依然生理貧開口論兵勢直
氣摩青雲長揖動卿相囊封登帝閭當路知己擬活
西江鱗鯨波泛大海去結山東民誓將三寸舌成此百
世勲艱難得生還和議已復伸智略無所施袒裼還遼

巡藏名酒肆中悲歌閱芳辰興闌却顧我相對南風薰
宛宛昔別地倏然今四春江山不改舊世事凡幾新是
非既未定涇渭何當分餘生各加餐此外不須云

喜晴

連山春雨來徑滑不容足行人相攀援泥濘及馬腹欲
往不得前野店可投宿朝來天宇佳笑語聞童僕宣城
半程耳山路聽詰曲自別賢主人三歲如轉燭應煩倒
屣迎喜氣見眉目新堂幾日成春酒此時熟珠璣傾錦

囊塵埃拂楸局上饒千里遠策蹇許追逐北歸預可料
詩作牛腰束

履方攜姜坦道詩卷相過為書其後

姜侯同鄉井憶昨初見時春風頭陀庵快作六字詩一
別十五年漂流各萍轉君攜此軸來如覲故人面淤泥
青蓮花本自不受塵得錢付酒保往往遭謗嘆蒼言方
遐思相從問消息清狂猶曩時鬚髮幸未白我貧過
孟郊何敢以詩鳴擬辦黃篋舫去尋白鷗盟懷人暮

雲碧憂國寸心折安得癯仙來共醉望沙月

代呼延信夫以笋乞猫于韓子雲

官居城一隅屋漏如野處辛勤補綠蘿僅可待風雨移
家幸亡恙所苦多碩鼠齧衣費紉縫盜肉恣含咀引子
動成羣啾啾疑爾汝汝曾無覩顏入暮誰能禦窺燈殫
膏油驚夢鬪儔侶主人非昔人為態尚如許飽食詎可
常潛蹤豈無所灌穴惡盡殺具磔難悉舉墻東吏部家
兩猫將十子往往感仁惠相乳忘彼此花塹夜不眠衛

寢如馴虎願分俊逸姿庶以鎮衡宇穿魚聘銜蟬於君
諒無取丁寧玉版師委曲致斯語妻孥仍有言乞猶宜
乞女他時遂生育隣里轉相予

簡查仲明

佛法若大海我生猶蚊虻飲少腹已滿鼓翅作微鳴查
侯飽禪學如說且能行有如遼天鶴豈受網罟嬰有身
未免俗時時還入城籃輿過茅屋無異同條生相見非
何事說法俱縱橫妙處固不二其實無所爭願君更方

便除我疑惑情要如兩圓鏡相照交光明

題王朝英歇驢圖

天寒山路長年荒蹇驢瘦風松適相遭金石方互奏是
中有佳趣捨鞍聊杖藜童奴難與言得句忘吾饑懷遠
空暮雲憂時當肉食市朝塵泥人歸歟北山北

送鄉人宗旨上坐

久客不忘歸相逢喜鄉曲杖藜時過門款語伴幽獨翩
翩別我去芒鞋踏清秋二浙富山水令人懷昔遊我今

齒髮衰聞道不加進羨君方妙齡六翮宜自振末法日
頽弊叢林魔說多願君擇師友金玉須琢磨他時重逢
迎洗耳聽高論豈惟慰相思亦以警老鈍

與常不輕奕棋輸松枝筆一篇

南山蒼髯翁閱世幾千秋終以明自煎晚為松滋侯孫
枝後來秀勁直餘風流亦學管城子來從毛穎遊故人
使江南江北停歸輶持贈比歲寒厚意豈暗投形貌若
黃犒風度猶清修輕健殊可人不作繞指柔我貧得長

閑造物因冥搜詩成呼使前脫帽明牕幽旁無賞音人
賴爾能點頭無論及錢神政恐為爾羞

繡觀音

蜀人多巧思組繡用功深生綃三尺餘成此觀世音慈
悲歡喜容如出旃檀林蓮花隨步武纓絡縵衣襟手中
楊柳枝時布慈雲陰擔度諸有情能以音聲尋由茲
善幻力使我生恭欽仰瞻大自在本以一寸針衆生與
諸佛其實同此心願學聞思修苦海脫浮沉

紫蘇

吾家大江南生長慣卑濕早衰坐辛勤寒氣得相襲每
愁春夏交兩脚難行立貧窮醫藥少未易辦芝朮人言
常食飲蔬茹不可忽紫蘇品之中功具神農述為湯益
廣庭調度宜同橘結子最甘香要待秋霜實作腐罌粟
然加點須薑蜜由茲頗知殊每就畦丁乞飄流無定居
借屋少容膝何當廣種藝歲晚愈吾疾

答權幹用命字韻見惠

我我儒衣冠所貴知義命大造若坦途狂夫蹈邪徑惟
君異流俗學古師往聖窮居飲一瓢輕視車千乘粹然
白玉溫卓爾青松勁風流入蓮幕忠恕自天性愛賢易
好色避利如深穽時邀野人語亦說禪家病不辭王事
勞益知仁者靜兼旬當濶別強飯遵時令邊城霜露寒
淮鄉道里賁事物多感懷篇章應寓興

連屋

十年誦公詩正自識孫楚一日從公遊如入圖書府登

門跡已熟入室心相予及觀連屋處益知用意苦巖巖
中書君正色元祐年文章照今古神物護簡編盛德宜
有後諸孫如彼賢韡韡常棣華相戒南陔篇

欽定四庫全書

自鳴集卷二

宋 章甫 撰

七言古

驄馬

門前驄馬無人騎
北風落日長聲嘶
細看毛骨獨殊衆
或言來自流沙西
伏櫪忍遭奴隸辱
立仗難貪五品粟
將軍邊塞敢橫行
願同生死俱馳逐

次韓中父送行韻

素琴橫床巾漉酒千載斯人吾尚友祇今與世已相違
再見喜君真耐久笑我生緣良易足畬田新燒屋新築
飯牛政自不須歌失馬焉知未為福百里未容君疾驅
朝廷用才當不拘他年得意輦轂下莫忘詩篇寄田舍

送王純仲

客裏因依三日語爽氣津津見眉宇自云縱酒少年場
拋擲黃金如糞土條馬四十髮斑斑手板青衫才一官
江湖陳跡不復夢食貧月俸仍酸寒別去不勞重嘆息

富貴有時君努力青春難再却堪憐恨不相逢十年前
別陸務觀

江南江北雖一水欲濟無由若千里那知奔走避邊塵
邂逅西津見君子一飯山間同野僧花前把酒看張燈
醉吟落紙筆不停留客夜闌雙眼青才氣如公端有幾
半刺江城聊復爾新年華省用名郎謂韓無咎彙征公合聯
翩起人生相知貴知心道同何必問升沈客袂此時成
暫別詩盟他日會重尋

采石

江行十日風打頭采石江邊還小留龍宮煌煌俯湍流
搢衣再拜祈神庥出門逕作蕭寺遊危亭縹緲臨金牛
江南江北蒼烟收日落未落雙蛾愁尚書麗句世罕儔
惜哉度曲無歌喉折梅置酒齋堂幽黃冠不飲空夷猶
野僧舉觴橫青眸更得大斗償香羞興闌山下却登舟
使君愛客方綢繆夜深杖藜弔荒丘列炬照野經塍溝
居人竊視聲咿嚶好事從來無與侔促坐款語相答酬

傷今懷古風颼颼泊渚高吟聊寫憂然屏照怪知何求
醉狂夜披紫綺裘騎鯨入海窮冥搜聖賢寂寞江悠悠
人在天地真蜉蝣况我此身如贅疣從公行善臭味投
有酒如川容拍浮但願早登黃鶴樓痛飲浩歌更勸酬
一弔禰衡鸚鵡洲

益睡

主人頎然腰十圍一官會計同遊嬉開軒環坐只圖史
錦囊富有驚人詩邇來萬事不掛口世情盡付鼻中吼

便腹無妨弟子嘲著鞭未落少陵後紛紛逐臭皆羣兒
我正黑甜曾未知雞蟲得失何足較是身且卧黃琉璃
博山生雲香斷續當午清風度脩竹門前吏立鴈鷺行
童奴揺手眠方熟夢中了了欲何鄉寧復蘧蘧栩栩忙
寒泉洗耳石礪齒主人家住廬山傍他時但取青氍舊
歸作春秋同社友北窗槃礴上羲皇秫田多種釀壺酒
奉太夫人千百年兄弟對床聽雨眠

送楊德雋赴漕司試

木食草衣吾計決三釜養親君不闕胡為亦赴槐花忙
不共中秋醉明月君言時世眩虛名才見頭銜分重輕
一第如君當俯拾卜隣他日莫寒盟

寄題郭侯至喜堂

岷江西來會衆水峽束奔湍吁可畏長年三老更相賀
舟到夷陵若平地寧知市朝車馬塵仕路風波尤畏人
急流往往捷有神灩澦瞿塘何足云祇今四海滔滔是
未省幾人知此理君侯不與世沈浮家有新堂名至喜

武昌重鎮居上游雲屯禁旅皆貔貅君侯智畧誰與儔
天子久寬西顧憂令嚴將士無驕色玉帳晝閑人語寂
中齋一榻淨無塵自炷爐香讀周易有時領客尊酒同
雅歌投壺雙頰紅門前官柳搖春風想應目送天邊鴻
狐兔中原須盡掃功成身退天之道角巾歸路颺輕舟
童僕驩迎人未老

种基祖蔡仲逸孫祖顯一時官遊荊州官閑無
事五日一宴集使僕持鉢其間念既飽食不可

無語

君不聞薊孝廉日飯二十家一朝拂袖去京國追之不可空咨嗟又不聞賓頭盧應供四天下神通妙用固非難中有巍然不動者今年有客來荊州半世生涯一敝裘仙風道骨愧二士諸公亦許相追遊邇來傳食初無間醉飽無勞主人勸絕勝詩人杜拾遺所歷諸家纔一飯

芍藥呈韓丈

妖氛深蔽洛陽縣我生不識姚花面揚州風物舊曾遊
佳種年深亦多變去冬淮上起邊塵不謂見花當此辰
眼明忽憶往時事世間尤物能移人公詩寄興多高遠
早悟色空香不染飽聞嘗醉洛陽春試比姚花定褒貶
韓使君分送芍藥索詩因憶舊遊

憶向西津擢酒船維揚去結看花緣杖藜到處花輒好
天紅艷紫相留連散盡黃金攜酒友夜深明月還京口
中流擊楫來悲風天濶參橫移北斗俯仰光陰恰十春

二十四橋經戰塵眼明忽見揚州種
衰病無因賈餘勇

寄題極星亭

大厯三年杜少陵先生曾下瞿唐適江陵晚泊松滋

江亭感興賦詩其卒章有今宵南極外甘作老人星

之語

杜詩紗帽隨鷗鳥扁舟繫此亭江湖深更白松竹遠還青一柱全應近高唐莫再經今宵南極

外甘作老人星隆興癸未歲代都王履方客食是邑以書問

亭之名於番陽章甫請榜之曰極星並作古風寄題

亭上

杜陵白首尚書郎三見灤西春草長忽思蒼梧叫虞舜
翩然短棹下瞿唐晚泊江亭生暝色野服出船烏帽側
南極一星落江湖戰塵蔽天兵未息閭閻惡少印纍纍
不夢周孔嗟吾衰機心去盡魚鳥狎在處詩篇神護持
四百年間一彈指當時松竹今餘幾南望冰魂不可招
波翻落日愁雲起

寄趙鄂州

田家禾黍方登場枯桑索索天雨霜黃花籬落尚可醉

今我不樂思武昌武昌使君半年別前日書來慰愁絕
相思為我作西亭徙倚闌干只明月大材開府何優游
政聲日隨江水流賜金增秩未為寵咫尺丹詔催歸輶
燈前春雨同揮翰南風吹船著淮岸雲間過鴈喚愁生
短褐飯牛歌夜半

以王通一所畫小舟橫截春江圖為韓無咎壽
江上春風花滿樹春水才平舊痕處何人笑傲一扁舟
橫截千波萬波去王郎有句藏毫端寫出生綃半幅間

明窗供我時展玩髣髴羅帶紫煙鬟絨題請壽皇華使
如公福祿川方至吾君願治正思賢舟楫期公濟大川

簡張安國

南北東西厭問津四海忘形今幾人惟公名譽一世重
雖不吾與吾當親氣吞雲夢並餘子深厚文章六經似
昂霄聳壑正當時發策決科餘事耳上方憂顧大江東
虎踞龍盤氣象雄却袖玉堂揮翰手來成方面保釐功
西風澹日邊雲碧歲晚軍情猶未得不應矯首送飛鴻

想得攢眉正憂國雅聞一諾直千金推挽尤多樂善心
坐上能容野人否試聽客裏短長吟

張使君以畫屏求題

西湖景物天與奇歲晚春風常探支水邊竹外更幽絕
一夜花開南北枝何處飛來兩灘鵝影碎晴波蕩春碧
荷蓋凋零荇帶寒徘徊如與花相識短屏畫手豈無心
待公歸赴西湖春年年春色花照席應念揮毫老賓客
臨江何氏結亭松間名曰彈秋因王通一來乞

詩

萬籟從風俱發聲惟松得之尤善鳴五聲不亂無虧成
膝橫三尺秋月明君家江南一茆屋直幹森森伴幽獨
人言絲竹不如肉曲肱聽度無絃曲故山偃蓋未十圍
猿驚鶴怨吾當歸聊憑東風寄君詩風鳴松鳴吾不知
送李文授還越上

舊歲見君殊草草懷抱今來各傾倒新來正好數相尋
束裝却向山陰道千巖萬壑秋更奇候門兒女望君歸

扁舟此去來何時莫待梅花開北枝故人問我憑君說
滿目窮愁生事拙秋禾未得補飢瘡萬一飛蝗作檀越

簡熊帥景瞻

槐柳陰中數間屋麤飯濁醪羹杞菊過門問字久無人
只有圖書伴幽獨剝啄是誰來扣扃手持札翰趨吾庭
風采九州安撫使得得遣騎相招迎我願識公從宿昔
貴賤殊途那易得親染雲箋責草廬驚喜盈懷仍歎息
折節下士古所稀豈意於公今見之况公位貌已崇重

英聲凜凜威羗夷滿堂賓客皆豪傑從容何止談風月
野人自視殊缺然或可為詩紀勲業

早涼

江頭雨過涼風早落葉紛紛費人掃鉤簾日暮無所為
把酒悠然送歸鳥佳人可望不可親草根唧唧秋蟲吟
家本江南客江北鬚髮新添數莖白

次沈商卿見懷韻

歌喉宛轉變鳴禽載酒曾同花下吟寒潮不應宿漁浦

挑燈還憶夜深語十載故人誰似君便擬卜鄰桑柘村
青錢未辦歸期遠滿目春山空秀婉有酒何須身後名
高軒未必如徒行朝看桃杏發紅萼晚來風雨嗟零落
尋幽選勝不應遲百歲光陰能幾時問君何日憩奔走
忍令春色成烏有

寄淮東總領許叔庸

太平寺裏留詩別江北江南幾秋月那知未著侍臣冠
坐總軍儲持使節平生一飯不忘君蟠胸萬卷皆經綸

聞說別來頭更白憂國祇今能幾人憶昨同傾京口酒
笑我凋零已蒲柳曉驅黃犢破荒煙留眼看公印如斗
短篇自昔蒙品題老矣無復能新竒樂府流傳妙天下
小胥鈔寄定何時

移家謝趙再可

病眼不禁黃土眯塵纓屢費滄浪水曉窗笑語鏡中人
但可寘之巖穴裏縣官有田容我耕收身已是太遲生
醉眠牛背自安穩山鳥慣聽哦詩聲經營小築深幽處

借車歡喜移家去，非公誰寄草堂貲。
知我舊諳茆屋趣，此心此地俱寬閒。
從渠曠野多風寒，燈前兒女話團圓。
廣厦期公千萬間。

謝張倅惠茶

病軀倦甚不舉酒，便腹枵然尤愛茶。
淮鄉久住已成俗，客至亦復研芝麻。
稱重緇奩還入手，知公與我詩情厚。
靜無俗駕扣柴關，急遣僧房借茶臼。
易足堂中晝倍長，一杯涼餅補飢腸。
世間萬事不掛口，齒頰盡日留甘香。

青奴可憐姑少却睡魔退舍詩魔作詩成吟罷來清風
秋意拂拂生梧桐

謝韓無咎寄新茶

武夷仙翁冰雪顏建寧府中春晝閒揮毫醉寫烏絲欄
新茗續煎扶玉山應念窮愁寄空谷頭白眼眇書懶讀
殷勤題裹寄春風澆我從來藜莢腹別公宛陵今五春
渴心何啻生埃塵平生不識七閩路夢魂欲往山無數

簡李牧之

落日還家聊面壁剥啄誰來破幽寂語音相似桑梓同
風骨軒然雙頰紅疊疊清談霏玉屑多說東湖與霜傑
江西故老已凋零聽君論詩猶典刑君今久占宣城籍
我是江湖未歸客客愁時事兩蒼茫一醉邀君君莫惜
張君明昆仲袖唱和詩見過

村東主客羣飛鴻月明霜重聲摩空村西老人如瘦馬
伏櫪倦嘶天北風村東村西無百步杖屨相尋還有數
兒啼妻病不出門羞見梅花無好句雪晴日出天無埃

故人躡屐聯翩來明珠白璧滿懷袖使我一見雙眸開
文章雖云一小技妙處非難亦非易染絲織錦未足工
點鐵成金始為貴我窮半世坐吟詩詩成不救寒與飢
亦知造物厭嘲弄有手只堪持酒卮願君少吟詩幾首
請君多辦酒百壺但得新詩勝舊年為君醉倒春風前
元用見過誦詩劇談因成古風以成戲惱兼簡
若晦唐卿

有口只可飲醇酒世事令人三日嘔有耳只可對詩翁

俗語令人三日聾平生嗜酒耽佳句此外自知無用處
東風吹我墮江邊歲晚知音罕相遇誅茆蓋頭無少閑
數日不到諸君間塵土眯眼鬚鬢斑誰賦淮南大小山
怪底晴簷靈鵲噪籃輿相尋談絕倒恨君無乃酒量窄
愛君豈獨詩格老開尊喚客知何時坐上可無俞與韋
更長不怕杯行遲願見春風楊柳枝

用前韻贈高持一

全身當作冥飛鴻無心要似雲行空逢人未用青白眼

與世不妨牛馬風暇日出門聊散步雪晴愛此山無數
骨寒那得使鬼錢腸枯謾索驚人句邇來筆研欲生埃
舊雨來人今不來百歲光陰能幾許一春懷抱未曾開
古人元不貴多技大道由來常簡易隨呵之義復何憂
知我者希方足貴華陽道士亦能詩不覺餐霞坐忍飢
高山流水琴三弄明月清風酒一卮相思不見頻搔首
幾欲招呼無斗酒從今與子遂忘年有懷欲語子來前

次呂伯恭見寄韻

魯鈍不如錐處囊嗜好鑿圓投枘方鏡中鬚髮今蒼浪
多病年來疎酒觴山林舊約都茫茫局促何由心膽張
半生恍墮水中央疾呼四顧無舟航客舍雨餘梅杏黃
憶君著書看屋梁緘題到手伸讀忙亦知別後遙相望
我猶駑馬遭絆韁君若鷹鷂之老蒼見義勇往柔而剛
君不求名名自彰行須正色肅鵬行不容燕雀高飛翔
辱詩敢忘什襲藏報章勉率聊寄將廣廈他時客幾房
種成桃李滿江鄉忍使故人趨道旁

濡湏道中

今年淮西旱城市無米糴所至蕭條童僕飢手持楮幣
無人要行不擇日糧不齎恨身不生太平時還家從頭
語兒輩山中寂寞猶可耐

白露行

今歲淮南雨仍缺官府祈求已踰月城中又復閉南門
移市向北人紛紛州前結壇聚巫覡頭冠神衣競跳擲
縛草為龍置壇側童子繞壇呼蜥蜴簫鼓迎神來不來

旱風終日吹黃埃寧知白露只數日稻苗焦枯恐不及
送王道士

華陽洞天昔曾遊華陽道士今相訪江頭倦客老更拙
山中故人喜亡恙晴沙喚渡何匆匆鴻飛冥冥天北風
他日希虛如話我憑君一一謝諸公

--	--	--	--	--	--	--	--

欽定四庫全書

自鳴集卷三

宋 章甫 撰

七言古

督祖顯和章

孫侯二尺短檠前何啻頌詩三百篇金鑾玉堂未歸去
聊結江湖山水緣官閑不復弄朱墨勝日過門無惡客
春風快馬紫遊韁花底黃鸝盡相識酒酣談辯翻波瀾
得句全勝得好官我亦從來有詩癖撚髭一字吟難安

不知辛苦竟何益聞道何妨死今夕他年儻使無知音
盈編不作一錢直日來頗怪詩筒遲恐君豫辦磨崖詩
中原窟穴尚孤兔未應便草閑居賦

放歌招孫祖訓俞國寶飲

兒時望春春不來春衣隔年催剪裁平明出遊薄暮回
惟恐雲氣興風雷豈知樂極還悲哀十年黃塵浣青鞋
管領鶯花已無意感時念舊時傷懷去年寒食丹徒縣
家寄毗陵不相見今年寒食江陵府妻子相看淚如雨

迂儒憂國更憂家枉殺清明不見花無端柳絮攪愁思
一逕漫漫春日斜主人知我坐憔悴故遣斗酒來相慰
呼妻安穩置床頭箇是貧家一祥瑞床頭三日未開嘗
耿耿憂心自如醉朝來忽覺體中佳吻角流涎已難制
細君平日但濡唇瓦盆對酌可無人招朋一飲舒清興
要須脫畧任天真高郵孫夫子相逢不作馬上語臨川
俞先生客裏傷春作詩苦二公問學該今古曾吞雲夢
輕阿堵我酒雖不多酒行詩可歌杖藜乘興速來過不

來吟醉奈春何

聞鵲鳩

陰雲欲暗江頭樹屋角先聞鵲鳩語
瀟瀟漸作打牕聲
誰道巢居不知雨雨晴喚婦却同飛
須知此物心無機
豈比人間情義變銜冤誓死不相見

題九歌圖

大夫放逐沅湘濱嘗作九歌祠鬼神
鬼神幽遠不可見
肴酒芬芳猶福人
食菊佩蘭君不識從彼讒人為鬼蜮

楚江嗚咽楚雲愁坐對此圖三歎息

題王無邪九華圖

雲錦仙翁人不識多生九華茹芝客少年登覽妙形容
三十七峯俱改色手提高士談墨圖煙雲到處隨卷舒
珠璣衮衮入題詠縑素往往爭臨摹雪潭四時濺飛雪
歎我幻軀方病渴何由得共山中人脚踏寒流弄明月

王夢得捕蝗二首

相逢每歎俱飄流尊酒作意同新秋蝗蟲日來復滿野

府帖夜下還呼舟江天尚黑客騎馬草露未晞人牧牛
路長遙想兀殘夢家在風煙蘭杜洲

江頭曉日方瞳瞳僕夫喘汗天無風茅簷汲井洗塵土
野寺煮餅燒油葱平生憂國寸心赤在處哦詩雙鬢蓬
村民喜識長官面樹陰可坐毋匆匆

分蝗食

田園政爾無多子連歲旱荒飢欲死今年何幸風雨時
豈意蝗蟲乃如此麥秋飛從淮北過遺子滿野何其多

撲滅焚瘞能幾何羽翼已長如飛蛾天公生爾為民害
爾如不食焉逃罪老夫寒餓悲惱纏分而食之天或憐

憫農

前村後村水車聲伊伊軋軋終夜鳴皇天不雨四十日
高田何止龜兆出田家眼穿望早禾早禾不熟奈饑何
今年神祠禱不應沽酒買牛空費多天公高居民父母
有耳應聞下民語乞我滂沱半朝雨免遭縣吏鞭笞苦

田家苦

何處行商因問路歇肩聽說田家苦今年麥熟勝去年
賤價還人如糞土五月將次盡早秧都未移雨師懶病
藏不出家家灼火鑽烏龜前朝夏至還上廟著衫奠酒
乞杯琰許我曾為五日期待得秋成敢忘報陰陽水旱
由天工憂雨憂風愁殺儂農商苦樂元不同淮南不熟
販江東

送茶與人

雲氣昏昏釀秋雨歲月驚心遽如許潮生晚浦足風波

頗憶青燈夜深語贈君江南春露芽恐君誦詩眼生花
一杯靜對沈煙斜世事從渠如亂麻

早雪

賤夫流落來淮海兩紀悠然忘凍餒烏薪白粲不論錢
近歲山林禁樵採去年差官打炭窰淮民畏事誰敢燒
官軍巡山得心力草木欣欣有顏色九月未霜雲漫漫
雪花爭先飛作團凍坐孤吟還自寬邊頭牽挽人夫寒
雪中張仲庠惠十詩老嬾不能追逐戲答古風

兼簡陳伯茂

愛君詩好韻屈奇快如天馬不容羈惜君有錢不沽酒
盡日苦吟難療飢我生真成錯料事陳子生涯畧相似
敢持短兵與君接笑我老來長退怯空山一夜雪盈階
軒牕晃耀如瑤臺尊中尚喜有餘綠紅潮兩頰心悠哉
安得萬里江變作葡萄醅笑呼姮娥共起舞夜闌更酌
北斗杯一醉三千年從教海水揚塵埃妻孥笑我言此
樂恐未諧典衣且復沽茅柴淮南有薄田與汝歸去來

願身長健眉長開好插梅花醉幾回

春日呈韓丈

陽烏陰兔爭馳騁人世光陰刹那頃玉盤生菜亂青絲
三歲公家喫春餅前年班春池陽城民物熙熙簫鼓聲
去年轉粟巡邊徼聖朝初下和戎詔祇今塞上不傳烽
野梅官柳競春風相從且作無事飲莫辭節物來匆匆
明年上國春應早棠棣陰中詩更好詩成但遣阿買書
郵筒寄我江南道

劉裸卿送筍

俗子貪錢如食蜜幽人愛竹如種玉君家大隱城一隅
萬个深園數間屋陽春不住長兒孫犢角猫頭還滿目
却恐繁陰礙風月童奴時取供肴藪朝來想挂北牕坐
應念先生食無肉故遣此君來起予爛斑嫩籜森盈束
先生飢腸非雷吼米糲鹽醯羹杞菊急呼瀹釜然枯薪
殷勤留客晨炊熟不羨侯家五鼎烹得此一飽萬事足
客去關門聽雨眠枕上詩成翻水速

清明病中遣酒問訊史授夫

一榻蕭然唯坐卧
風雨欺人打窓破
數片飛花何處來
寒食清明病中過
疎狂閑憶少年時
問柳尋花夜不歸
春衣一任酒狼籍
玉山自有人扶持
日月變遷衰相現
世途迫隘令人倦
耳冷那聞白雪歌
眼寒不識春風面
懷君著書坐僧房
呼兒與撥浮蛆香
往澆萬卷文字腸
莫學病夫多感傷

惜花

前朝西風不肯住紅雨毵毵落深樹昨日東風更放顛
香雪紛紛飄滿園四時催人頭髮白薄相春風亦欺客
漸覺繁枝過眼空歷歷黃花亂疎麥野店沽酒酸如齏
先生不飲春將歸屋頭向晚雨聲急自炷爐香坐盤膝

盱眙館中題雲山圖

北風三日吹黃土長淮浪高少人渡客愁正坐小牕間
眼明見此江南山好山連娟螺髻髮白雲無心終日閒
野橋溪流彎環旁有幽人畫掩關道路只今多險艱

林泉有約吾當還黃精可駐冰雪顏時時令人雙鬢斑
葉子逸以惠山泉淪日鑄新茶餉予與常鄭卿
惠山泉甘苦不冷日鑄茶香方是真廣文喚客作妙供
石銚風爐皆手親神清便欲排閭闔且了吾人淡生活
餅芽分送已無餘杯水尚容消午渴

戲簡樂長卿

長卿談兵氣飄揚半生謾趁槐花忙塵埃綠綺誰拂拭
雞羣野鶴空昂藏何必明經取青紫請君囊書獻天子

中原猶未息兵戈萬里橫行丈夫事懷夫株守衡門裏
初無長鬚給薪水故舊經年絕尺書烏鵲玩人頻送喜
欲行萬里囊無錢移床且對薰風眠兒啼妻怒了不問
誦詩過午聲琅然

雨涼成詩一首簡子逸

坦率每愁遭怒嗔閉門直欲全吾真美人娟娟不可見
薄俗往往難相親夢斷風扉自開闔還喜晚涼生意活
未能衝雨過蘇端且乞新詩慰飢渴

戲簡李清宇

四十九年真大謬三百六旬長鮮驪人生一夢何足較
田穀薦饑良獨難酒邊志氣漫豪放鏡中骨相殊酸寒
輸與能詩李供奉水旱不憂吾有官

送張安國

前日見公如桂林梅黃風雨天多陰今年見公長沙去
草綠江湖春水深借問長沙多少路盡是前年曾到處
如公正合在朝廷胸中素蘊經綸具吾君一視而同仁

且欲煩公蘇遠人親朋漫作別離惡王事敢辭行役頻
嗟予潦倒百無用客食淮南兩相送青山可買坐無錢
日長只作還鄉夢九重早晚催賜環了却功名歸故山
屋頭乞我茆三間布襪青鞋相伴閒

題趙純甫渭川千畝圖

君家矢姥山前居未辦種竹先作圖不惟要與千戶等
亦念豈可一日無勁節虛心聽霜露細香靜色宜風雨
玉版禪師得飽參翠袖佳人定何許津津喜氣見眉間

準擬他年如此閑可無嵇阮相往還俗客儻來君掩關
題張希穎筠坡圖

緣坡種竹自成趣簾輿造門今有誰張侯好事果絕俗
因人隔江來覓詩披圖識面恨不早更愛諸公妙詞藻
繁霜密雪得天全明月清風為君好易足堂前方欲栽
摩挲短軸心眼開忽思江南讀書處碧玉如椽歸去來
颺稻行

屋頭場地如鏡光未曉相呼來破場今年慚愧好天色

颺稻得風尤省力分時往往只論筭主客四六無偏頗
高低十分早晚禾就中誰家收最多妻兒舂糯試新麴
隣舍茅柴相接續醉來起舞自頓足官無差科即為福

題長蘆方丈

笑別靈巖日當午籃輿輒輒轉江浦眼明初入菩提場
一燈傳自西來祖老禪留客苦殷勤汲泉煮茗添爐薰
空江向晚無人渡明月滿天秋正分

中秋次韻

秋浦堂前有清集久客思家淚痕濕連年客裏作中秋
今歲還家又無及山中茅屋冷如水應念征塵何日洗
邊鴻也解寄歸音旅燕亦能辭故壘滔滔四海知音誰
公家公子歲寒期殷勤為我撥新釀煖熱向我哦好詩
我生志願良自足肯向天涯長碌碌願君腰金佩鳴玉
從我羹藜飯脫粟秋風舟子兩相催側帽長吟歸去來
開帆轉施清溪口還山要赴重陽酒

諸公過易足為紅梅一醉醉後率成數語

一冬雪與寒俱少膏澤春來頗傾倒畏寒病嬾不出門
未覺心情被春惱花木今春種種遲眼明始見紅梅枝
容顏頗稱俗子意風骨獨有詩人知人生百年誰滿百
去日漸多來日窄衰顏已減舊年紅短髮明年應更白
甕頭有酒不用沽肴藪得隨家有無主人頽然客亦走
明朝無事重來否

呈謝仲連

一葦江頭風雨寒邂逅三日同清歡諸塵不染眼自碧

萬事隨緣心已安
雨晴歸路馬蹄疾
問君呼船定何日
杖藜過我城南偏
遊戲世間文字禪

從賈倅乞猫

渚宮茅屋住經年
牆壁苦遭羣鼠穿
旋乞狸奴名去惡
中宵客枕得安眠
攜之俱東泛江水
厭飫魚腥二千里
半途忽作楚人弓
兒女憐渠今未已
昨朝聞說二車家
花塹五子俱可誇
此詩雖拙勝鹽茶
不問白黑灰狸花

書黃叔虎傳神卷

鶴骨何清癯腹空惟貯書山林日月長掉頭賦歸歟松
竹歲寒金石友身後虛名眼前酒與世相違豈盡然江
湖猶有丹青手

與北山長老

數間破屋城南街坐卧一榻心如灰現身幻化本無住
疾病問渠何自來剥啄誰歟破幽寂道人定起北山北
齒冰骨玉兩高寒禪病詩魔俱辟易我倦欲眠君且歸
籃輿入郭知何時貧家客來無準擬為君時供鷄蘇水

法剛化士幹蔣山藏經乞語

鍾山夜半發奇怪火光熾然脫三昧法筵龍象不須驚
寶公留得眉毛在食輪才轉法輪隨樓臺金碧還相輝
大千經卷何處覓剛禪藏在僧迦葉如來言語皆真實
別有真經名第一琅函寶藏不能收若遇知音請拈出
題張季子妄菴

世間種種無非妄云何以妄為菴榜君欲捨妄却求真
展轉思維增妄想即妄即真君勿疑真妄俱忘也大奇

笑我猖狂今老矣因君聊復妄言之

欽定四庫全書

自鳴集卷四

宋 章甫 撰

五言律

次韓无咎途中寄陸務觀

風高微退鷁雲好合從龍
蕭艾長貪雨松筠却耐冬
禁途今不遠歸興未應濃
莫羨朱雙轂相期祿萬鍾

戎馬驅馳日江湖邂逅間
笑談無逆旅翰墨落名山
畫省春風入漁舟夜月還
唱酬能見記書札忍令慙

寒梅欺雪白臘酒愛鵝黃花下觥籌亂燈前錦繡香醉
吟揮字大愁別聽更長近報蛾眉好何時奉一觴

晝永渾無事昏歸只掩門甘貧同陋巷多病似文園對
月人千里論文酒一尊遠懷霄漢路愁絕虎狼村
圍箏看成竹庭榴已著花老來猶是客歸去亦無家萬
事大槐國一身焦穀芽心閒聊默坐紅日下天涯

即日

苦憶花吹盡生嫌草長齊鶯啼春已暮客散日還西孺

子拋書卷童奴理菜畦怒雷將急雨一夜水平堤
吟苦知音少棋低敵手多故人無恙不薄酒奈愁何未
暇兔三窟聊同鷗一波傳聞江北路人應力田科
醉裏三春了山中五載留日長知己夏雨冷忽如秋書
貸監河粟箱存季子裘曲肱朝睡美身外付悠悠

春盡

晝永花陰直風輕麥浪勻僧歸還逼夏鶯語欲留春鬚
髮垂垂老親朋往往貧地偏人事少聊以寄吾真

獨登南樓兼懷嚴聖幾俞若晦

瓜茗難逃暑蚊蠅正作秋勞生一念錯晚境萬緣休筆
老無新語囊空有敝裘閑攜瘦藤杖獨上郡南樓

城外江山好樓前市井喧登高明遠目直北望中原濟
世原無策傷心不忍言唯餘憂國淚還共水潺湲

畫景微微斂陰雲稍稍低炎涼催旅燕風雨聽鳴雞獨
立江樓上相思浙水西詩情兼酒伴何日手重攜

夜坐

枕簟遲遲睡軒窗一一開市收人語寂江迴水風來熠
耀明衣袂嬋娟到酒杯新涼兒女健促織已相催

喜涼

暑氣今全減人心始少蘇客愁生海燕秋意入庭梧歲
月真虛擲詩書只自娛荆山誰獻玉齊國正吹竽

老去孤黃妳愁來賴麴生客居宜落寞寒事費經營歲
稔銀聲急夜長燈影明深懷不成寐四壁候蟲鳴

宿靈巖

異縣經年客靈巖一夕留涼風吹薄暮明月照中秋
閱世身將老尋山興未休還驅羸馬去訪古大江頭

不寐

不眠知夜永危坐起憂端木葉紛猶落篝燈炯未殘
年華今晚晚邊堠且平安以我衣裳冷遙憐弟妹寒

聞鴉

柳暗啼春處庭空反哺時鳴聲元自樂世俗亦多疑
凶吉何須問雌雄未易知寧棲丈人屋莫借上林枝

除草

惡草溷嘉蔬涼風獨荷鉏
薅耘非敢後滋蔓恐難除
女大知艱食兒癡亦廢書
歸來一長嘆不是厭山居

春日村居

築圃未成趣栽桃纔試花
年饑兒強飯春困婦煎茶
為客空遲暮逢人只歎嗟
上天新號令雷雨起龍蛇
村迴客來少山寒春到遲
修塘留野水挿槿補疎籬
旁舍閑相過幽人舊有期
出門看遠燒拄杖立多時

冬暖惟憂麥春寒却勒花地偏宜鳥雀江遠少魚蝦驚
犬時時吠歸鴻字字斜故園芳草色遊子亦思家

浦樹微微改溪流稍稍深春來差少病歲後苦多陰隴
畝三年夢親朋萬里心感時仍念舊老淚欲霑襟

土室宜冬夏柴門玩歲時不嫌貧作祟直恐老相欺草茁
牛羊壯山空虎豹飢天晴好挑菜吾亦伴兒嬉

新涼

白帝揚鑣後炎官退舍初江山驚客恨風月到吾廬黃

妳宜相就青奴稍見疎寄聲蓮社友秋興復何如

同湯叔度兄弟賦秋聲

古木斜陽暮寒江澹月秋蕭騷初滿耳蟋蟀最關愁
茆屋疑鳴雨雲溪想枕流幾回連別恨為我過西州

送潘致虛之湖南

久客兒童狎窮居草木長蛙聲猶鼓吹燕子亦炎涼
度日工詩律傷時灑淚行輸君載明月先我過瀟湘

即事

暑雨何時了江雲不肯開窮途惟有死薄俗動相猜怪
事供詩卷閑愁付酒杯欲從胡海去安得小舟來

俯仰憐身世飄零玩歲時道途多異說客子有新詩日
落乾坤慘風生草木悲高樓空北望清淚不勝垂

天意誠難測人言果有不便令江海竭未厭虎狼求獨
下傷時淚誰陳活國謀君王自神武况乃富貔貅

門靜悠悠日春愁淡淡天風塵殊未已形影自相憐有
客還詩債無人與酒錢感時歌慷慨憂國淚潺湲

風急收殘雨花輕點客衣江山爭秀發燕雁不同飛異
縣交遊少中原信息稀王師戰甚苦方解蔡州圍

弟妹今安在飄零各賤貧詩成難寄遠目斷更傷神風
俗殊方異交情白首新辛勤營一飽愧此百年身

探報無虛日淮東有捷音周王方北伐蠢動敢南侵四
海當多事羣公在一心祖宗功業盛德澤結民深

兩淮仍蜀道羣寇再侵尋不戒兵猶火唯誇旅若林皇
圖終復古天意亦難諶咨爾無猖獗須思後患深

羣寇仍猖獗城邊即棄捐休兵雖上策講信竟虛傳人
事今如此天心恐未然忍令唇齒地當此染腥羶

初失清河口駸駸遂逼人餘生偷歲月無處避風塵精
銳看諸將謀謨仰大臣悞夫憂國淚欲忍已沾巾

江北

江北多戎馬江南有戰船艱難吾欲老輾轉夜無眠歸
去須三選飄零又一年鄰舟聽客語愁絕晚來天

山行

江行風浪惡石路僕夫勞一水幾回渡亂山無數高村
醪清似鏡早稻細如毛愁聽田家語令人首屢搔

松滋縣作

月近中秋白雲隨落日橫途窮諳客味歲晚見交情念
舊傷存沒憂時尚戰爭西風催起柁鷗鷺莫寒盟

十二月朔巢縣道中

瘦馬從搖兀行裝更寂寥老來寧浪出此去有佳招歲
暮風霜苦山長館舍遙兒曹應念我今日是生朝

守倅元日唱酬次韻

別駕篇章敏黃堂句法新
宜民多受福把筆競題春
拖玉丹墀曉鳴珂紫陌塵
退朝如有作應亦念茲辰

舟中簡祖顯

計拙生無益時危老可傷
江山雙敝屣詩酒一空囊
夜雨茆廬破秋風菊逕荒
閑隨枕流客蓑笠釣滄浪
散髮扁舟上秋江一段清
魚肥新入饌鷗狎舊同盟
浦樹參差出雲山遠近迎
君詩妙圖寫不減謝宣城

雨中簡孫文輔

多病愁陰晦長貧慣寂寥一江雲漠漠十日雨蕭蕭蛙
黽誇秋水魚鰕趁晚潮新來疏酒盞頗覺負清宵

馬瘦憑誰相龜靈故自焦世途何偪仄物性各逍遙君
老嗟黃綬吾衰感黑貂雨寒無病惱酒熟即招邀

寂寂諸緣省縣縣一氣存心情親藥畏口味減盤飧
蘊無生話維摩不二門秋聲搖萬壑落葉會歸根

贈李君玉

奔走空塵土歸來日暝時
喜迎蓮社客細說錦囊詩
短世相逢晚高樓欲下遲
坐中無賀監誰與解金龜

老大何堪客窮愁畧不醒
髮因閑事白眼為好山青
月下南飛鵲風前自照螢
倚君如玉樹蒲柳愧凋零

登譙樓

老大心雖懶登臨眼尚明
水流春後煖樓迴晚來晴
翔集鳩無數歸飛雁一鳴
欄干成獨倚愁絕暮雲平

次郝澤民韻

歸雁衝寒去，棲鳥向日啼。
山明初過雨，沙淨不多泥。
江上梅花細，村中酒價低。
無人可同出，課僕理荒畦。

次通一見詒韻

酒力添春意，詩魔惱夜眠。
老來尤惜日，客裏又逢年。
送雁寒雲外，尋梅野水邊。
無錢供劇飲，空枉故人篇。

送任政道

蕭寺同時客，交情子更深。
有時長共說，無事即相尋。
臨水初分袂，因風數寄音。
青雲如得路，珍重歲寒心。

和沈商卿次前韻

故人邊上去春到未還家奔走因王事艱難感歲華詩
壇推俊逸醉帽想歌斜莫怪書題少新年眼更花
逢人問行李幾日至東園別去將三月書來得五言淮
山分限域風土異寒暄四大知安穩根塵要反源

王漕舟行邵白枯河之間一花獨秀有詩次韻
志在冥鴻上舟行白鷺羣水花明晚色詩態藹春雲獨
立興三歎孤斟為十分錦囊曾不惜還遣野人聞

陪王漕右司遊東園

籍甚皇華使詩清思不羣建臺多暇日領客總能文
花好盃重勸茶香手自分禮寬情爛熳小雨夜深聞
不到東園久從公喜再遊名花移別島新竹俯長流
蕩漾扁舟穩回還一逕幽甯中擅丘壑此地得冥搜

晝永花紅困煙輕草綠齊緩行金瑣細爛醉玉東西
棋局觀成敗河魚入品題門闌老賓客勝處謝招攜

再用前韻

公合麒麟畫吾今麋鹿羣別離頻換歲夢寐昔論文寒
盡春生後涇清渭濁分喜還親几席語妙得時聞

昔聞清華選湖山爛熳遊秋筠同節操春柳似風流鬢
鬢莖莖白園林事事幽天然詩句好初不待窮搜

紅紫今無幾寒暄尚未齊春愁人更瘦午醉日還西課
僕除新草呼兒檢舊題空庭可徐步藜杖故相攜

次王勉夫見招

浪迹踰三紀知音只數公拙非今日用愚與古人同賓

客雖常滿簞瓢或屢空躬耕逢歲旱拄杖立西風
風月分公宇圖書靜客堂交情知爛熳暇日想徜徉我
老嗟筋力詩成損腎腸報章慚不敏秋至足悲傷

送謝王夢得監稅借示詩卷兼簡王僉

人入江西社詩參活句禪盤珠無滯迹溪月有餘妍不
採龐公藥宜先祖逖鞭淹留茆屋底愁坐算商船
歲月易飄忽文章空怪奇宦遊君未達耕種我長飢事
往休三歎春來又幾時官閑宜把酒蓮幕最相知

憶弟妹

新年思弟妹何處有田園見面寧無日傷心不忍言飄
零空歲晚契濶又春暄腸斷東來水滔滔共一源

憂旱

貧賤甘羈旅淹留賴薄田悠悠將送老比比不逢年旱
魃工為虐雷公豈易鞭醉能忘萬事安得酒如川

白露

歲旱今如此天高豈不聞家家望秋穀日日有閑雲聖

主焦勞甚羣公獻納勤老農愁欲死祈禱漫紛紜
烈日照平野狂風吹槁苗皇天無一雨白露只明朝世
路多艱險人心恐動搖愁來惟有酒聊以永今宵

薦饑

隴畝還枯旱鉏犁謾苦辛饑寒知不免盜賊恐相因憂
國書生志安民聖主仁豐凶端有數天本愛斯民
久客身長健頻年穀不登天時有差忒人事亦因仍鵬
運溟南北魚呼水斗升世途惟論報誰飯在家僧

和俞若晦晚步

日落帆歸疾天寒潮應遲老蟾還照客宿鳥未安枝懷
抱難忘酒工夫不到詩徘徊江上路此意有誰知

閏月二日清坐

淮海秋風日柴荆老病夫詩因窮處得愁到酒邊無俗
物妨青眼浮生喜白鬚繩床供午寢清夢落江湖
秋閨遲收穫年衰惜友朋每懷人似玉安得酒如澠鵲
語何多誕蟬聲故可憎茶香新落磨亦足洗炎蒸

聞下親征詔志喜

聞下親征詔軍民喜溢顏天威方一怒國步久多艱思
古傷心處平戎反掌間書生苦衰悞空使鬢毛斑

秋日

奔走傷形役艱難感物華澹煙籠遠樹小雨濕寒沙喚
客尊無酒撩人菊有華弟兄書不至過盡鴈行斜
故人多鬼錄久客又驚秋為計無三窟懷歸在一丘鷄
鳴風雨晦鴈急稻粱謀憶我山中友天寒夜飯牛

清宇移居

懷抱俱牢落相逢得暫開
有時逃酒去排日送詩來
撫事空三歎移家又一回
秋涼安穩住莫負菊花杯

九日壽之見過

老去猶耽酒歸來自撥醅
絕憐黃菊好仍有故人來
懷古空三歎按香更一杯
橫山無十里騎馬未須回

過清宇新居再用開字韻

市遠鶯塵息聰明老眼開
句從天外得書自日邊來
久

住當成趣相看不忍回涼生初却扇月出好銜杯
書帙兒能整柴扉手自開夢殘江月上酒醒竹風來舊
集秋重校微吟日幾回初無俗客飯當有故人杯

送孟希道

異縣交游少隣牆歲月深有疏長共醉風雨亦相尋去
路逾千里離筵惜寸陰功名君努力衰病我何心

寄菴庵主

問訊菴庵主庵中事若何得詩堪供佛學道想無魔關

塞兵戈定江湖歲月多他年白蓮社藜杖飽經過

秋興

宿昔驅蠅手今還把蠓螯家愁難止酒天氣近登高歲
月形容改鄉關夢寐勞小牕無晤對風葉暮蕭騷

答仲韓醉中見和

外事添蛇足餘生嚼蠅螯牀頭新酒熟江上遠山高紀
詠能偷暇登臨莫憚勞獨醒誠可笑辛苦賦離騷

春日山居

流轉情何恨艱難老見侵兒啼妨午睡花落攪春心得
句從誰說開尊祇自斟移家近城市湖水幾時深
客舍逢迎少村居道路迷雨晴知虎過煙暝有鴉啼輕
薄看諸子辛勤愧老妻人生真寄耳巢燕亦添泥
村陋渾成俗雲山要可人短籬雞唱午芳樹鳥啼春地
僻愁仍少身閑懶更真扁舟因送客重到大江濱

登樓

空室才容膝樓高適與隣清秋宜眺遠瘦策故來頻鳥

雀寧知我江山不厭人哦詩兼把酒地主未嘗嗔

卜煥之求雙竹

結屋清江上憐君雅趣深自移雙竹種分得半簷陰特
立夷齊節相看管鮑心祇應風雨夜聽此兩龍吟

問祖顯疾

念子何多病逢人問好音可無安樂法未用短長吟陋
巷隣南北春風酒淺深杯蛇弓落影應已斷疑心

隱几維摩詰傷春杜拾遺觀身如聚沫憂國正攢眉藥

裏添新說腰圍減舊時朝來強飯不問訊一憑詩

送野堂禪師赴蔡公寶丈之招

早歲識諸公雙眸四海空叢林今日異風月往時同晚境無茆屋秋江又釣蓬毗耶大居士游戲有神通

次惠老見詒

別去忽三紀餘生能幾年相看雙眼碧且喜一燈傳禪病君無惱詩狂我欲仙劇談成絕倒還似蜜中邊

次郭遐齡所攜張安國詩韻

早作諸公客過門競挽留憂時心尚壯懷舊涕難收富貴來何晚文章老更優尊前身健在不必問封侯